

Na osnovu člana 5. i 29. Zakona o Vladi Tuzlanskog kantona („Službene novine Tuzlanskog kantona“, br. 17/00, 1/05, 11/06, 13/11 i 15/17), a u vezi sa članom 77. stav (1) Zakona o izvršenju Budžeta Tuzlanskog kantona za 2026. godinu („Službene novine Tuzlanskog kantona“, br. 18/25 i 3/26), Vlada Tuzlanskog kantona na sjednici održanoj dana 19.05.2026. godine, d o n o s i

ODLUKU

o utvrđivanju uslova i kriterija, načinu i postupku raspodjele namjenskih sredstava prikupljenih po osnovu naknade za obavljene tehničke preglede vozila

Član 1.

Ovom Odlukom se utvrđuju uslovi, kriteriji, način i postupak dodjele namjenskih sredstava za projekte iz oblasti saobraćaja i saobraćajne kulture u iznosu od 40.000,00 KM (slovima: četrdesethiljada konvertibilnih maraka), tekući transferi neprofitnim organizacijama, ekonomski kod 614300, funkcija 0451, (izvor 30) namjenska sredstva, potrošačka jedinica 22010001, Ministarstva trgovine, turizma i saobraćaja (u daljem tekstu: Ministarstvo).

Član 2.

(1) Sredstva iz člana 1. ove Odluke se dodjeljuju neprofitnim organizacijama koje će predložene projekte isključivo implementirati na području Tuzlanskog kantona.

(2) Sredstva se dodjeljuju u skladu sa Zakonom o izvršenju Budžeta Tuzlanskog kantona i planiranim sredstvima u Budžetu Tuzlanskog kantona.

Član 3.

(1) Dodjela sredstava neprofitnim organizacijama vršit će se isključivo po javnom pozivu.

(2) Pravo učešća na javnom pozivu imaju neprofitne organizacije koje su registrovane u Ministarstvu pravosuđa i uprave Tuzlanskog kantona, kao i neprofitne organizacije koje su registrovane u skladu sa zakonom na entitetskom ili državnom nivou, a koje će predložene projekte implementirati isključivo na području Tuzlanskog kantona.

Član 4.

Ministar trgovine, turizma i saobraćaja (u daljem tekstu: Ministar) će svojim rješenjem imenovati Komisiju koja će biti zadužena da razmotri prijave po Javnom pozivu za dodjelu sredstava i utvrdi da li su ispunjeni kriteriji utvrđeni ovom Odlukom, izvrši bodovanje i sačini preliminarnu listu sa nazivom neprofitne organizacije, nazivom projekta i iznosom dodijeljenih sredstava (u daljem tekstu: Komisija).

Član 5.

Sredstva se raspodjeljuju za projekte iz oblasti saobraćaja i saobraćajne kulture koji se odnose na:

- unapređenje vršenja kontrole tehničke ispravnosti vozila na stanicama tehničkog pregleda,
- edukaciju djece u predškolskom i školskom uzrastu iz oblasti saobraćajne kulture i poznavanja saobraćajnih propisa,
- edukaciju vozača o zaštiti čovjekove okoline i smanjenju emisije izduvnih gasova,
- promociju i organizaciju biciklističkih, auto i moto utrka i manifestacija,
- povećanje nivoa bezbjednosti saobraćaja,
- unapređenje nivoa usluge prijevoza putnika,
- obilježavanje značajnih datuma iz oblasti saobraćaja (dan vozača i automehaničara, dani bez vozila i drugi).

Član 6.

(1) Neprofitne organizacije su dužne uz aplikacioni obrazac dostaviti sljedeću dokumentaciju kojom dokazuju ispunjavanje uslova:

1. Rješenje o upisu u Registar neprofitnih organizacija (udruženja, fondacija i drugih ustanova koje ne ostvaruju dobit, koje nisu pod nadležnošću vlade i čiji osnivač nije država) kod

Ministarstva pravosuđa i uprave Tuzlanskog kantona ili drugog nadležnog organa u Bosni i Hercegovini,

2. Uvjerenje o poreznoj registraciji,

3. Projekat sa specifikacijom troškova ovjeren i potpisan od strane podnosioca.

(2) Dokumenti se prilažu u originalu ili ovjerenom kopiji, koja ne može biti starija od šest mjeseci, računajući unazad od dana objavljivanja javnog poziva.

Član 7.

Projekat neprofitne organizacije (aplikanta) iz člana 6. stav (1) tačka 3. ove Odluke obavezno treba da sadrži sljedeće podatke:

- naziv i opis projekta,
- oblast saobraćaja na koju se odnosi projekat,
- ciljeve projekta,
- vrste aktivnosti koje će se provesti da bi se postigli postavljeni ciljevi,
- podaci o uključenosti i broju volontera na projektu,
- ukoliko postoji partnerstvo, naziv partnera - druga neprofitna organizacija ili institucija iz javnog sektora sa dokazom o partnerstvu (ugovor i slično),
- očekivani rezultati projekta,
- rok realizacije projekta i
- budžet projekta razrađen prema aktivnostima projekta,
- specifikacija troškova sa visinom sredstava koja se potražuju od Ministarstva, vlastita sredstva ili drugi izvori finansiranja projekta (navesti detaljnu specifikaciju).

Član 8.

(1) Prijedlog raspodjele sredstava neprofitnim organizacijama (aplikantima) sačinjava Komisija, cijeneći pri tome ukupan broj bodova utvrđenih na osnovu sljedećih kriterija:

- oblast saobraćaja na koju se odnosi projekat,
- rok realizacije projekta,
- veličina ciljne grupe obuhvaćene projektom,
- broj uključenih volontera,
- partnerski odnos sa drugom neprofitnom organizacijom ili institucijom iz javnog sektora u realiziranju projekta,
- veći udio u finansiranju projekta iz vlastitih sredstava ili drugih izvora,
- teritorijalna zastupljenost na području Tuzlanskog kantona,
- promocija ciljeva Ministarstva u oblasti sigurnosti saobraćaja, veći kvalitet usluge prijevoza i promocija alternativnih vidova prijevoza sa ciljem smanjenja broja vozila na cestama i zagađenja životne sredine.

(2) Način bodovanja se utvrđuje Pravilnikom koji donosi Ministar, na prijedlog Komisije.

(3) Pravilnik iz stava (2) se objavljuje zajedno sa javnim pozivom.

Član 9.

Prijavljeni projekti neprofitnih organizacija (aplikanata) neće se uzeti u razmatranje ukoliko:

- prijedlog projekta nije u skladu sa članom 5. ove Odluke,
- ne dostave dokumentaciju za dokazivanje ispunjavanja uslova iz člana 6. ove Odluke,
- ne razrade projekat kako je definisano članom 7. ove Odluke,
- su projekti i aktivnosti napravljeni samo u korist članova udruženja,
- projekti sadrže vjerske ciljeve i aktivnosti ili kojim se želi vršiti edukacija ili propaganda usmjerena samo na određene vjerske skupine,
- administrativni troškovi projekta, pri realizaciji, premašuju 30 % vrijednosti ukupnog budžeta projekta,
- nisu dostavili ili su neblagovremeno dostavili izvještaj o utrošku sredstava koja su im dodijeljena za prethodnu godinu u skladu sa potpisanim ugovorima,
- nisu opravdali dodijeljena finansijska sredstva, u potpunosti ili djelimično, a koja su im odobrena u skladu sa potpisanim ugovorom za prethodnu godinu.

Član 10.

(1) Maksimalni iznos sredstava koji se može dodijeliti po jednom projektu je 4.000,00 KM.

(2) Neprofitna organizacija (aplikant) ima pravo na javni poziv prijaviti samo jedan projekat, i to pod uslovom ukoliko isti nije planiran u Programu manifestacija od interesa za Tuzlanski kanton za tekuću godinu.

Član 11.

(1) Svi prijavljeni aplikanti će moći pogledati preliminarnu listu na web stranici Vlade Tuzlanskog kantona i Ministarstva.

(2) Rok za pisani prigovor na preliminarnu listu po javnom pozivu je pet dana od dana objave na web stranici Vlade Tuzlanskog kantona.

(3) Prigovor se upućuje u pisanoj formi Ministru.

(4) Odluku o prigovoru donosi Ministar u roku od pet dana od dana isteka roka za prigovor.

(5) Odluka Ministra po izjavljenom prigovoru je konačna.

(6) Po okončanju roka za prigovor na preliminarnu listu i nakon rješavanja prigovora, Ministar donosi Odluku o utvrđivanju konačne liste o odobravanju finansijskih sredstava korisnicima sa iznosima i namjenom.

(7) Konačna lista će biti objavljena na web stranici Vlade Tuzlanskog kantona i Ministarstva.

(8) U roku od 15 dana od dana donošenja Odluke o utvrđivanju konačne liste, Ministarstvo zaključuje ugovore sa neprofitnim organizacijama (aplikantima), kojim će regulisati međusobna prava, obaveze i odgovornosti.

(9) Prilikom potpisivanja ugovora potrebno je dostaviti karton deponovanih potpisa od banke sa kojom aplikant ima potpisan ugovor.

Član 12.

Nadzor nad korištenjem odobrenih sredstava (kontrolu namjenskog utroška odobrenih sredstava na osnovu dostavljenih izvještaja korisnika sredstava) kontinuirano će vršiti komisija koju će posebnim rješenjem imenovati Ministar.

Član 13.

(1) Ministarstvo će u roku od 30 dana od dana donošenja ove Odluke objaviti javni poziv.

(2) Javni poziv za dodjelu sredstava se objavljuje na zvaničnoj web stranici Vlade Tuzlanskog kantona i Ministarstva.

Član 14.

Odluka stupa na snagu danom donošenja i biti će objavljena u „Službenim novinama Tuzlanskog kantona“.

BOSNA I HERCEGOVINA
Federacija Bosne i Hercegovine
TUZLANSKI KANTON
V L A D A

Broj: 02/1-23-13856/26
Tuzla, 19.05.2026. godine



PREMIJER KANTONA

Irfan Halilagić